

LE  
**SVRVEILLANT**  
 DE CHARENTON.

Au Duc de Boukinghan pour examen de  
 son Manifeste, ou procès verbal  
 du 21. Juillet dernier.

PSEAV. XCIII.

*voicy, tes haineux, Sire,  
 Tes haineux defaundront,  
 Et les meschans viendront  
 A se foudre & destruire.*

---

M. DC. XXVII.

LE  
SARVEILLANT  
DE CHARANTON

Le Directeur de l'Asile  
pour l'Incurables  
de la Folie

DE LA  
Maison de  
Santé  
de  
Charanton

---

M. DE LA VIE

3

LE  
SVRVEILLANT  
DE CHARENTON.



V'au Diable soyez vous donné, Monsieur le Duc & vos Anglois avec. Que fussent-ils encore tous foireux dās Lódres, à prédre du tobac, & à boire de la bierre tout leur saoul. Quel besoin est-il, ie vous prie, que vous faciez ainsi le Cheualier de la table ródre, & que vous veniez de gayeté de cœur troubler nostre repos par vostre belle descente en l'isle de Ré? A ce que ie voy le zele de la maison du Seigneur vous deuore, & en auez la ceruelle si eschauffée que les cheueux de la teste vous en tombét, quoy qu'on die que cela vous viéne plustost de ce ieu d'amour, qu'on nomme en François *la Pelade*. Vous auez, ma foy, bonne grace de nous en conter par vostre Manifeste, comme si les Huguenots ne pouuoient subsister que par la protection que vous leur offrez. A d'autres, vos fineses sont cousues de fil blanc, & vous portez (comme on dit) des sabots, on vous entéd venir de loing: Mais ie crains bien que vous ne ressembliiez au Singe, qui sautant de brâche en branché, monstre en fin le cul quand il est monté au haut de l'arbre. Ie ne croy pas aussi que l'histoire de vos faits d'armes soit iamais autre chose qu'un des plus iolis Romans du temps. Palmerin d'Oline, ny Perceforest ne feront rien au prix de ce grád Admiral de Boukinghan. On m'a autre fois appris à l'eschole, quand i'estois petit grimaut, qu'Alexandre ne pouuant pousser ses conquestes plus auant, fit semer le long d'un fleuue proche de

4  
l'ennemy, forcemords de bride d'une grosseur desmesurée, & des armes fort pesantes & de grâdeur incroyable, pour donner de la terreur à ces nations là, & leur faire pèser qu'elles eussét eu à faire non à des hômes cômuns, mais à des Geans du tout formidables, & môtez de même. Vous en voudriez bien faire croire autant aux François par vostre espouventail, côme si le Maistre que vous seruez auoit des soldats à miliôs, où que semblable à vn Pompee il ne fit que battre du pied en terre pour en faire sortir des armées, & leur faire passer la mer en faueur de nos Eglises. Certes ie doute grandement que vous ne soyez non plus auoué de ces rodomontades, que du mestier d'Arbitre dont vous vous meslez. Ie vous diray sur cela que ces iours passez il arriua qu'un Gentilhomme nostre voisin ayant noise avec ses valets, un mien compere se voulut faire de feste, & oyant le bruit entra brusquement au logis du Maistre pour faire les hola: mais les vns ny les autres ne pouuans supporter la censure de ce compaignon, ils se ruent tous sur la friperie, & l'estrillerent de façon que de long temps il ne luy aduiendra de mettre son nez aux affaires d'autrui. Il me semble aussi quel' Almanach de Jean Petit predict qu'il y aura cet Automne un certain Argonaute qui se trouuera mauuais marchand de ses vaines entreprises, & qui voulant procurer du bien à autrui, fera fort mal ses propres besognes. Ie crains qu'il ne vueille parler d'un Milor d'Angleterre qui a la trongne faite comme vous. Si cela vous arriue, comme il est à esperer, on croira que c'est le iuste payement que vous meritez, pour vous estre voulu entremettre de ce qu'un Prince a à traicter avec ses subiects. Il vous semble que vous nous obligez bien de nous tesmoigner par vostre Manifeste que le Roy de la grâde Bretagne n'a porté ses armes en France que pour nostre



protection. Mais qui a requis cela de luy, de quel droit se veut-il mesler d'affaires où il n'a que voir, & où il n'est nullement appellé? Certes si ce que vous luy faites dire estoit veritable, ce Prince auroit vsé de grande dissimulation enuers la France, *l'alliance de laquelle il n'a recherchée (selon vostre aduis) que pour operer plus utilement & plus puissamment à la restitution des Eglises en leur ancienne liberté & splendeur.* Certes il me semble en vsant de cel langage pompeux que vous nous exposez à la risée du monde, veu que pour toute Antiquité, il n'y a pas cinquante ou soixante ans que nostre Religion est en vogue. Cela respond à la simplicité d'un bon gentilhomme de la Beausse, lequel ne parle jamais de la naissance de nostre belle Reformation, qu'il ne die tousiours, *du temps de l'Eglise primitive*, comme si Luter & Calvin auoient esté contemporains des Apostres, ou de leurs plus proches successeurs: Mais laissant à part toutes ces formalitez, ie viens au fond de vostre Manifeste, là où par vne kirieille de paroles entassées comme il plaist à Dieu, vous voulez persuader aux plus credules *qu'un si puissant Roy qu'est le vostre a esté eludé ouuertement, & qu'on ne pouuoit esperer de luy qu'un ressentiment esgal & proportionné aux iniures receues.* Voila bien debutté pour vn grand Admiral. Or pour reprendre les choses de plus haut, & comme à leur source, il est vray que le Roy par le traicté de Mōtpellier nous auoit promis la démolition du fort de la Rochelle, & a encore donné depuis esperance que cela seroit: mais au reuers de la medaille, vous oubliez de dire que les plus gens de bien, & ceux qui ont le plus à perdre dans cette ville là, ont recouru à sa Majesté, & luy ont representé que si ce caueçon estoit osté, ils seroient exposez à la mercy de certaine marpaille, tirée de la lie d'un peuple mutiné qui les estrangleroit dans leurs lits, quand la fantaisie les en

prendroit. Vous adioustez encore d'un meſme air, *Que Roy voſtre Maistre a eſte inſtrument & moyenneur de la derniere paix, ſur des conaitions aſſez deſauantageuſes, & qui n'euffent iamais eſte acceptees ſans l'intervention du Roy voſtre Maistre, qui interpoſa ſon credit enuers les Eglises pour les recevoir, meſme avec menaces, afin de mettre l'honneur du Roy Tres-Chreſtien à couuert.* Je vous nie tout cela, Mōſieur le Duc, prouuez-le. Car pour moy ie croy qu'il n'en eſt riē. Bien ay-ie ouy dire que les Ambaſſadeurs d'Angleterre furēt priez par ceux de la Rochelle d'interceder enuers ſa Maieſté, afin qu'elle leur accordaſt la paix. Ce qu'ils firent par charité reformee entre gens de meſme confrerie: Mais d'inferer de là que le Roy ait capitulé avec voſtre Maistre vne ſi honteuſe compoſition, qu'il l'ait conſtitué garand d'un tel traité entre luy & ſes ſubieſts, c'eſt choſe que nous ne croyons pas à Charanton, y ayant vn peu en cela de la gloſe d'Orleāſ. Car d'uſer non plus de menaces enuers des gens qui ne vous recognoiſſent en blanc ny en verd, il n'y a pas grande apparence, non plus qu'il n'eſt croyable que le Roy voſtre Maistre ait mis l'honneur du noſtre à couuert. Car où pouuoit, ſ'il vous plaĩt, ſon honneur eſtre offencé? luy qui eſtoit victorieux & trióphant ayant gaigné lors vne bataille nauale contre les Rochelois? Et ſi d'ailleurs, ayant traité avec ſes ſubieſts, ils n'ont de leur part accompli les choſes cōuenues, ce bon Prince doit-il eſtre blamé comme ſ'il deuoit ſeul exccuter tout de ſon coſté, ſans qu'ils ſoient tenus de rien faire du leur? A-ton démoly par tout les nouuelles fortifications des places, comme il auoit eſté arreſté? Et ſi par forme de recrimination il eſtoit permis de vous reprocher des manquemens de foy, qui auoit promis de faire plus de choſes, que le Roy voſtre maistre par les articles de ſon mariage? A-ton fait ſcrupule en Angle.erre de

violer tout ce qui auoit esté solennellemēt iuré en France? Qui a réduit les Rochelois nos bons cōfreres si odieux à toute leur Patrie, que les continuelles depradations & pirateries sur leurs voisins? Vous monstrez encore que vous estes tousiours mieux instruit de ce qui se passe, quād vous dites *Que l'on a voulu faire des cabales dans ceste ville là pour y ouvrir les portes aux troupes voisines, par la division qu'on y faisoit glisser entre les habitans.* Mais quelle piece mettez vous sur le tapis pour verifïer cela, & quand il seroit vray, quel crime est-ce, ie vous prie, à vn Roy s'il tache de se rendre absolument Maistre d'une ville qui est à luy, & qui ne recognoist son autorité que cōme bon luy semble? En fin ie voy bien sans lunettes de Hollande qu'il vous suffit de semer de la zizanie dans nostre chāp, & de descrier tāt qu'il vous est possible l'estat des affaires publiques pour vous rendre tant plus agreable à ceux que vous desirez circonuenir & attraper, cōme des mulots par vos faux appasts. Certes à ces gens qui sont ennemis de tout ordre, & qui ne veulent estre esclairez de pres, c'est bien peine perdue de leur enuoyer aucun Magistrat de la part du Roy, veu les nazardes qu'ils ont accoustumé de faire à ceux de cette robe, le Renard mesme pour aduisé qu'il fust, n'en ayant peu eschapper en Bearn comme remarque le Mercure François. Vous nous voulez encore embeguiner d'une autre faribole quand vous dites, *Que vostre Maistre n'a opposé à tant d'inïures & de violens de foy, que des plaintes & des entremises, iusques à ce qu'il le ait en aduis certain, confirmé par lettres interceptées des grāds preparatifs que le Roy Tres-Chrestien faisoit pour venir fonder sur la Rochelle.* Mais cōme Diogenes voyant vn ieune homme qui se cachoit de luy, pour n'estre veu dans la ruerne, *plus tu recules (luy dit-il) plus auant t'as fourré :* De mesme, plus vous pensez iustifier les actions du Roy vō-



estre Maistre, plus vous les rēdez blasrables, & indignes d'un Prince voisin, & si proche allié de la Frāce, laquelle il est venu attaquer sans dire gare, & sans aucune denonciation de guerre au prealable. Car laissāt à part vos façons de parler insolentes, calomnieuses, & lesquelles il semble que vous ayez apprises des harangeres de la place Maubert, en ce peu de tēps que vous avez seiourné à Paris, ie vous demanderay seulement quel droit vostre Maistre a eu de se rendre protecteur des subiects du Roy, quand ainsi seroit qu'il auroit eu dessein d'attaquer la Rochelle? faudra il que nos Rois ayent pareatis d'un Roy d'Angleterre quand il leur plaira de chastier la rebellion de leurs subiects? Et alors (dites-vous) *qu'est-ce que sa Majesté a peu faire de moins que de vendiquer son honneur par un prompt armement contre ceux qui l'auoient rendu complice de leurs tromperies, & faire voir son integrité, & le zele qu'elle a tousiours en au restablissement des Eglises.* Au contraire (Monsieur le Duc) ie croy que vostre Maistre ne scauroit iamais faire chose plus iniuste, ny qui luy soit plus à honte que cette belle equipée, & crains fort que nous ayāt pēlé ayder il ne nous ait du tout perdus, par le mauuais predicament où il nous met enuers nos compatriotes, qui nous soupçonneront tousiours de vous auoir appellé, encores qu'il n'en soit rien, & que la faute de quelques particuliers ne doit pas estre imputée à tous ceux de nostre Religion: Mais ce qui vous trompe est l'imaginatiō que vous auez que le Roy nous ait promis la démolition du fort Louys, & que vostre Maistre soit demeuré caution de cela. Chose qui est fausse & du tout controuuée, ne vous en desplaise. Car lisez & relisez tant que la berlue vous en vienne, ceste belle declaration du 11. Feburier 1626. que vous prenez pour fondement de vos premieres armes, vous n'y trou-



uerez rien qui approche d'une promesse où le Roy se soit engagé de démolir le Fort. Premièrement la nullité de cette piece est telle, qu'elle ne faict aucune foy, n'estant qu'une chimere que le Comte de Hollande & le Milor Carleton comme Ambassadeurs extraordinaires ont extraordinairement forgée pour se chatouiller, & pour penser par là obliger nos Eglises à embrasser tout ce que vous voudrez entreprendre contre cet Estat. Car ny le Roy ny aucun de ses Ministres n'a signé en tout cela, & croy en mon peu desens, que vous brassiez dès lors ce que vous avez maintenant executé tant vostre zele est bouillant. Voicy donc les mesmes paroles dont vous vous armez comme vn Carabin faict de son plastron. *A ces causes déclarons & certifions que les paroles dont on avoit auparavant convenu avec nous pour l'accomplissement dudit traité, & lesquelles furent proferées en presence & par convenance de sa Majesté tres-Christienne par Monsieur le Chancelier, lors de l'acceptation de la paix, contenant (parlant de nos autres Messieurs) que par leurs longs services & continuels obeissances, ils pourroient attendre de la bonté du Roy, ce qu'ils n'eussent jamais obtenu par aucun traité, & choses mesmes qu'ils estiment plus pressantes, & lesquelles on pourra en temps convenable, esconter leurs supplications faites avec respect & humilité, il y avoit encore plus claire interpretation de la parole de sadite Majesté, & de Messieurs ses Ministres à nous rapportée par Messieurs les Entremetteurs de la paix, personnes de qualité relevée, ordonnez & introduits avec charge & pouvoir de sadite Majesté, & Messieurs ses Ministres, dont le sens & intelligence, est qu'ils entendoient parler du fort Louys devant la Rochelle, & par là donner assurance de sa demolition en temps convenable. Voyla en fin le sujet qui vous fait faire vn si grand Broüas, comme si de ces simples paroles*

vous auiez à en tirer des promesses expresses. S<sup>re</sup> Majesté pour auoir donné esperance à nos Depute d'escouter fauorablement les supplications que nous luy ferions en tout respect & humilité, & de pour uoir à nos affaires en temps conuenable, ces Ambassadeurs par vne fine & transcendante maniere de ratiociner, veulent faire croire au monde, en nous alleguant des gens inuisibles, que le sens & intelligence des paroles du Roy se doiuent interpreter de la demolition du fort de la Rochelle, lequel on lçait estre demeuré à sa Majesté par le dernier traicté fait avec ceux de nostre Religion. N'est-ce pas dōc là vne piece qui engage fort son honneur, & qui oblige vostre Maistre de le venir forcer la dague à la gorge d'executer cette promesse ideale. Certes qui s'aideroit au Chastelet d'un tiltre si peu authentique qu'est ce papier volant, il en seroit condamné aux despens & à l'amende. Il vous falloit pour mieux jouir vostre roolle emprunter vn pretexte plus specieux que non pas ce que vous vous estes forgé à plaisir, pour besfler seulement les niais & les badaux. Car qui a du sens aussi gros que la teste d'une mousche, iuge bien que tout cela n'est qu'artifice, & encore si grossier qu'il n'y a pas grand esprit à l'auoir inuenté. R'engainez dōc ie vous prie ce beau traicté imaginaire, où deux Ambassadeurs d'Angleterre nous parlent comme il leur plaist, sans que le Roy ny aucun de ses Ministres soit interuenu en tout ce qu'ils se font croire pour excuser la belle cagade que vous ferez vn de ces matins. Et encore si vous estiez demeuré dans les termes de ce mesme traicté tout desguisé qu'il est, vous n'auriez pas d'abord pris les armes pour le faire accomplir : mais vous y eussiez procédé par prieres à l'endroit d'un si grand Roy. Car ces deux zelateurs du bien public disent qu'ils nous

donnent assurance que le Roy leur Maistre travaillera par ses intercessions ioinctes à nos tres-humbles supplications pour abregger le temps de Ladite demolition. Appelez-vous en Anglois intercessions vn armement suiuy de tous les carnages que vous avez faictz en l'Isle de Ré, laquelle vous estes venu surprendre iniustement & contre le droit des gens? Dieu nous garde de tels intercesseurs: Mais retournant à l'examen de vostre Manifeste, ie vous diray qu'il me semble qu'il y a vn peu du Fanfaron, en ce que pour nous effrayer comme avec l'esponuentail d'une cheneuiere, vous nous faictes grande parade des forces de vostre Maistre, dont on ne void (dites-vous) qu'une poignée d'hommes en cette Isle, où vous protestez de n'estre venu que comme Protecteur de nos Eglises, & non pas en conquerant. Grand mercy Monsieur le Duc, la France vous est bien obligée de ne luy auoir amené que des troupes auxiliaires, & qui sont fort petites au prix de celles que le Roy vostre Maistre entretient ailleurs, outre le grand secours qu'il a enuoyé en Allemagne. Certes vous vous pouuez bien vanter des hauts faits d'armes des Anglois aux pays estrangers. Les Barbares en scauroient dire des nouuelles d'un costé, & ce Prince infortuné de l'autre. Vous avez enfin faict tellement trembler la Germanie sous vos armes que tout le Palatinat est entierement gaulé pour celuy qui estoit allié d'un si puissant Roy, & lequel le laisse viuoter chez ceux qui luy donnent aujourd'huy du pain par pitié. Le Marquis Dourlac, le Langraue de Hessen, le Duc de Brunswich, & le Marquis de Brandebourg ont esprouvé combien le secours d'Angleterre leur a esté salutaire. Aussi ce vaillant Roy, oncle de vostre Maistre, a de sa grace tellement tasté de ceste drogue, qu'ayant laissé escorner le pays de ses voisins, il travaille aujourd'huy com-



me vne femme qui accouche, à defendre son propre foyer, tant s'en faut qu'il ait restauré les affaires d'autruy, comme vous pretendez leuer le menton aux Huguenots de la France. C'est là l'effect de ces armes formidables dont vous nous menacez, & lesquelles ie ne voy pas auoir mieux reüssi sur mer que sur terre, ainsi que ce beau voyage de Calis en faiët foy, & où vostre belliqueuse nation ne receut que de la honte pour toute gloire. C'est ainsi que vous sçauiez débeller & reduire à la besace ce puissant Roy que vous dites auoir en teste. C'est ainsi que vous luy sçauiez susciter vne fourmilierie de petits ennemis qu'il deuore comme vn Dragon, & lesquels estans foiblement assistez de vos armes seruent d'autant de degrez pour esleuer tousiours plus son Throsne, & pour luy ouurir le chemin à cette grande puissance, où il semble que vous le guindiez à force de dire qu'il y va, tant cette prediçtion est de mauuais augure. C'est la France, & non l'Angleterre qui peut seule conforter ses Alliez, & faire contrepoids à la grandeur de celuy contre qui vous aboyez sans le mordre. Et si vn Duc de Saxe, si vn Prince d'Anhalt, & vn Duc de Vuirtemberg n'auoient esté plus sages que de se reposer sur vostre secours comme sur vn foible roseau, vous croyez bien qu'ils auroient dâsé le mesme branle qu'ont faiët ceux qui se sont engagez sur des esperances si friuoles. Ie ne pense point que la fortune vous soit plus favorable en France, tant pour l'iniustice de vostre cause, que pour la mauuaise destinée de vostre guide ce grâc Capitaine, qui ressemble proprement aux statues de Mercure qui monstroient bien le chemin du doigt, mais elles n'y accompagnoient pas, non plus que les Trompettes ne vont iamais au combat quoy qu'elles sonnent la charge, & y eschauffent les autres. On dit aussi qu'

le iour de vostre descente en l'Isle de Ré, où il se fallut  
bourrer, ayant affaire au braue Thoyras, il s'en remist  
du tout à saint Blancart son bras droict, & s'acquittant  
du deuoir d'un bon enfant, il s'en alla visiter Madame sa  
Mere à la Rochelle, se ressouuenant du verset que nous  
chantons en nostre parroisse.

*Honneur à Pere & Mere porte,  
Afin de tes iours allonger  
Sur la terre qui tout apporte,  
Là où Dieu t'a voulu lager.*

Ceste action genereuse est pour couronner toutes les  
precedentes, & mesmemēt cette signalée victoire qu'il  
gaigna sur ce grand Duc de Montmorency, lors qu'il  
deffendit si courageusement ses nauires à la mode des  
Andabates qui combattent en reculant. Car aussi tost  
qu'il vit paroistre ce ieune Mars il fist voile en Angle-  
terre pour conseruer sa personne aux Eglises, ou peut  
estre pour y aller apprendre del'Orateur Prime Rose, la  
harangue qu'un si illustre Boutefeu doit faire un iour en  
Greve à l'edification des Fideles. Vous ne pouuez donc  
pas manquer à ne rien faire qui vaille, estant si puissam-  
ment assisté de ce Champion, que vous regardez desia  
de trauers, pour vous auoir figuré les choses toutes au-  
tres que vous ne les trouuez pas. Car à son dire il n'y en  
auoit que pour un desieuner. Les forts de l'Isle se de-  
uoient rendre d'abord & sans coup ferir. Toute la No-  
blesse Huguenotte du Poictou deuoit s'armer en vostre  
faueur. Vous voyez neantmoins tout le cōtraire, la plus  
part s'estant rangée dans les troupes du Roy. Toutes  
les autres Prouinces se deuoient remüer, & vous voyez  
toutefois comme ce grand General de nos Eglises ne  
s'occupe (Dieu mercy) qu'à faire des depeschés, l'aîné  
estant bien plus sage que le Cadet s'il n'est pas si vaillant.

La Rochelle vous deuoit aussi ouurer ses portes, incontinent qu'elle verroit vostre prestance en si bel arroy. Mais elle vous fait visage de bois, & me doute bien que vous estes homme pour faire vostre entrée deuant cette ville là, laquelle se ressouuenant que si elle a jadis chassé l'Anglois de chez elle pour marque de sa fidelité & de son amour enuers sa Patrie, elle songera plus d'une fois auant que de se remettre sous le ioug qu'elle secoia si genereusement. Vaines & pipeuses sont donc toutes vos protestations, nous faisans accroire que les forces de vostre maistrene sont qu'auxiliaires, & que ses armes n'ont pour but que le seul bien des Eglises, lesquelles par tant de raisons & de considerations si importantes, il se sent obligé deuant Dieu & les hommes de proteger & secourir. Vous ne pechez qu'en excès de courtoisie, tant vous estes ciuil & accort: mais nous vous remercions tres-honorifiquement de tant de bien que vous nous procurez. Il n'est pas besoin que vous vous mettiez en si grands frais pour l'amour de nous. Nous auons graces à Dieu vn bon secours, & vn bon Protecteur en France & en terre ferme sans en prendre vn d'outre-mer. Nous n'en voulons point d'autre que nostre Roy, sous l'obeyssance duquel nous respirons en toute liberté de conscience. Ne nous laisse-t'on pas chanter les Pseaumes de Marot au ton que nous voulons? Ne nous laisse-t'on pas manger librement des pois au lard tout le long du Carême? Nous oblige-t'on de ieusner ny vigiles ny Quatre-temps? Ne viuons-nous pas gayement sans scrupule, sans sinderese, & sans nous confesser iamais de mal que nous fassions? N'est-ce pas là vn chemin tout de veloux pour aller doucement en Paradis? Que nous pourriez-vous procurer de plus gracieux que cela? Car de penser donner des Abbayes & des Eueschez à nos Ministres comme on



faict à ceux d'Angleterre, il vous faudroit bien sauter des fossez auparauant. Je crains d'autre part que vous ne deueniez tout maigre du soing que vous vous donnez de chose qui ne vous touche en façon quelconque, & laquelle vous nous reprochez plustost à mauuais dessein que de volonté, ny de pouuoir que vous ayez d'y remedier. Car parlant de la rupture du commerce, vous faictes semblant de plaindre le peuple de France qui gemit (dictes-vous) *non seulement sous le fardeau de tant de taxes & d'impositions, mais qui souffre aussi des necessitez de la vie mesme.* Certes si nos peuples se sentent des maux de la guerre, & qu'ils vous maudissent pour les estre venu troubler, ie suis tres-assuré que ceux d'Angleterre ne vous ont pas en moindre execration, parce qu'ils voyent bien que vostre caprice leur coustera cher. Le Marchant y pert tout son trafic. Le pays se sent surchargé de la despense qu'il faut contribuer à vostre armement. Il ny a que le Soldat qui vit de rapine lequel profite de ce trouble, & dont mesmement ils s'enrichit si peu, que le bordel & la tauerne deuoront tout son butin, d'autant *qu'en faict de picorée, ce que le gantelet paigne, le gorgerin le mange,* disoit le Capitaine Baiard. Nos peuples ne sont donc pas seuls qui se plaignent des miseres de la guerre. L'Angleterre en a sa bõne part. Mais ne vous figurez pas que pour cela, les François vueillent changer de Roy, le caractere duquel ils ont appris d'auoir en particuliere veneration. D'ailleurs, vous faictes tousiours plus le brauache sous couleur que vous auez surpris vn Prince desarmé sur mer, & qui ne se meschant point de ses voisins, avec lesquels il viuoit en paix ne reditoit qu'à son loisir de se munir de vaisseaux, & les faire construire à sa commodité: Mais à cet heure qu'il recogneu vostre mauuais dessein, il se preparera de

sorte, que Dieu aydant vous n'aurez nul aduantage sur  
 luy, quoy que vous vous vantiez que pour ruyner tout son  
 establissemēt sur mer, il ne faudra que de simples lettres de mar-  
 que aux Anglois quand vostre Maistre en verra le temps. Ne  
 chantez pas, ie vous prie, le triomphe auant la victoire.  
 Vous pouuez bien croire que l'Admirauté estāt aujour-  
 d'hui arborée d'un chapeau rouge, à la gloire de nos Lys  
 on n'espargnera chose quelconque, ny de soing, ny de  
 despence pour la releuer au plus haut point d'honneur  
 qu'elle ait iamais esté. Finalement, en vous pēfant ex-  
 cuser, vous vous chargez d'un grand blāme en nou-  
 voulant persuader que quelque recherche qu'on ait fai-  
 d'accommodement, vous n'y auez iamais voulu enten-  
 dre: Chose qui descrie tout à fait le Roy vostre Maistre  
 comme s'il estoit si testu & si acariastre que chose de  
 monde ne l'eust peu flechir. De dire qu'on ait esté necessi-  
 à cet armement pour ne pouuoir plus esperer un accommodemēt  
 le contraire est tout manifeste à qui vouldra considerer les re-  
 chersches qui ont esté faites par diuerses fois, tant par leurs pro-  
 pres Ministres, que par les Ministres des Princes estrangers ve-  
 le Roy mon Maistre, pour à leur instigation traiter un accom-  
 modement. Ne voit on pas par là que l'Angleterre est  
 son tort, & qu'il n'a pas tenu à la France que la paix  
 se soit conseruée, puis que vous accordez vous mesme  
 qu'elle l'a recherchée? Ne voit-on pas (dy-ie) que vo-  
 nous auez voulu faire vne querelle d'Allemand sous  
 pretexte qui est beau en apparence, mais qui a l'inte-  
 tion tres mauuaise. Car vous vous couurez du mante-  
 de Religion pour palairder dessous, & croyez que vo-  
 iustifiez assez vos actions quand vous dites, Que le Roy  
 stre Maistre n'a esté contrainct de prendre les armes par aucun  
 interest particulier, mais pour la deffence des Eglises seulement  
 de la seureté & liberté desquelles il demeure responsable. M

comme cet Hebreu demandoit à Moÿse, *qui est-ce qui t'a constitué Juge entre nous ?* ie voudrois bien aussi sçauoir de vostre Maistre, qui luy a donné l'autorité de demeſſer vne fusée qui est entre le Prince & ses subiects, sur lesquels l'Anglois n'a nul pouuoir que celuy que l'ambition luy fait imaginer. En vain, en vain nous celebrez vous la pieté de vostre Maistre, puis qu'elle se conuertit en ceste violente iniustice que de protester à armes ouuertes que son dessein est l'establissement des Eglises, son interest leur bien, & son but leur contentement. Il est, au contraire, fort à craindre que vous n'ayez mis ces mesmes Eglises en mauuais estat, & qu'il n'eust beaucoup mieux valu pour elles que vous ne fussiez iamais passé la mer à leur occasion. Bref, si vous estes tout Rodomonte en vostre cartel, vous ne vous monstrez pas moins poly & elegant sur la fin, où vous dites, que si on fait tout ce que vous pretendez, *Que ces tambours battans & ces enseignes desployées seront resserrees, & tout ce bruit de guerre demeurera ensevely dedans la nuit & dans le silence.* C'est certes là vn langage si beau, si pimpant, & où il y a tant de Phœbus, que ces trois mots si bien arrâgez vous eussent fait meriter pension de la feu Reyne Marguerite, si elle vous en eust ouÿ tant dire à son disner, sur vn autre suiet que sur celuy qui menace la France, de l'honneur de laquelle elle estoit trop ialouse. Voila (Monsieur le Duc) ce que i'ay deu remarquer sur vostre placard iniurieux, qu'on peut dire estre comme vne grenade iettée parmy les subiects du Roy, pour les enflâmer non à vne simple rebellion, mais à vne infame reuolte. Croyez que s'il y a quelques cerueaux mal timbréz qui se laissent emporter à vos perſuations, & qui croient de leger, il y a force gens de bien de nostre Religion qui demeurans constamment en l'obeyssance qu'ils doiuent à leur Roy, feront la nique à



tout ce que vous sçauriez dire pour les desbaucher.  
 Nous n'estimons pas que vostre Maistre soit si mal con-  
 seillé de se tailler plus de besongne qu'il n'en sçaura fai-  
 re. Nous voyons de grands apprests de tous costez con-  
 tre luy, s'il ne vous commande de vous retirer de là où  
 vous vous estes venu percher, sans qu'il en ait, peut estre  
 eu la volonté. Car ie sçay que les Rois sont cūmunémēt  
 bōs, & que le vostre n'estāt pas de mauuais naturel, il n'y  
 a peché que par le poison que vous luy auez versé dās son  
 oreille. C'en'est pas aussi mon intētion de dire chose qui  
 puisse offencer vn si grand Prince, ayant appris de mon-  
 sieur de la Miletiere qu'il faut *encenser les puissances*: Mais  
 pour vous, il n'y a pauure barbet qui soit plus chargé de  
 puces qu'on iette de maledictiōs sur vostre teste. Et si les  
 nostres mesmes ne vous espargnēt pas, vous croyez bien  
 que les Catholiques vous déchiffrent de l'air qu'il faut.  
 Car on nous dit que les Chaires de Paris retētissent des  
 imprecations qu'on vous fait, sans respect de vostre Ex-  
 cellencē maritime. Il y a entre autres Predicateurs vn  
 bon Pere zelé qui va iusques aux Sauenes pour conuer-  
 tir vn Huguenot, lequel vous dépeint de toutes vos  
 couleurs en ses sermons, où parlant ces iours passez des  
 fauterelles de l'Apocalipse il dit, qu'il n'y en auoit point  
 d'autres que les Anglois, veu les maux qu'ils estoient  
 venu faire en France. Vous appliquant aussi le texte du  
 mesme Apocalipse, il s'adressoit à ses auditeurs avec vn  
 ton de voix fort esleué. *Rendez-luy (disoit-il) ainsi qu'il  
 vous a fait, & luy payez au double selon ses œures, en la coupe  
 en laquelle il vous a versé, versez luy en au double.* Si ce nou-  
 uau Gedeon (adioustoit-il) se vante qu'il vient pour res-  
 taurer les Eglises pretendues de ce Royaume, ne seroit  
 il pas plus iuste que les Princes Catholiques se rallias-  
 sent, qu'ils ioignissent leurs armes, & qu'ils passassent ex-

Angleterre, pour y aller repurger & sanctifier les Téples  
 & les Autels de Dieu, pollus & profanez depuis l'horri-  
 ble schisme du Roy Henry huitiesme? Roy que le Pape  
 auoit honoré du tiltre de Defenseur de la foy, pour auoir  
 escrit & soustenu la cause del'Eglise contre Luther, les  
 successeurs de ce Prince impie faisans encore parade de  
 temesme tiltre, contre le saint Pere duquel ils l'ont re-  
 ceu. Si les Heretiques, dy-ie, sont cōiurez de toutes parts  
 contre les Catholiques, n'est-ce pas vne iuste & sainte  
 querelle si on s'oppose à leurs desseins, & que nous es-  
 pandions nostre sang pour l'espouse du Sauueur du mō-  
 le? Si ce beau Reformateur proteste qu'il viét assister les  
 Huguenots de la Frâce, ne seroit-ce pas vne œuvre plus  
 pieuse, & plus meritable d'aller secourir tant de patures  
 Catholiques qui gemissent sous le ioug de la cruelle ser-  
 titude & perlecution qu'ils souffrent en Angleterre?  
 Ont-ils pas desia chassé & prosript ceux de l'isle de  
 Man sous des pretextes de bibus, parce, dit Monsieur le  
 Duc, qu'ils vëdoient leurs viures trop cher aux Anglois?  
*Deus non irridetur.* Le bon Dieu ne veut pas estre moc-  
 qué, & croy que si nous le mettons de nostre costé, tout  
 nous reussira à bien, comme au cōtraire, il n'y a que ma-  
 lediction par tout où son honneur & son diuin seruice  
 sont balancez par des respects humains & friuoles. Je  
 n'ay en n parle ainsi (Messieurs) à cœur ouuert, & comme  
 je le croy en mon ame. Car ie ne suis point Predicateur  
 ni tiennne vn pied deçà, vn pied delà, en s'accommodât  
 au temps. S. Hierosime m'appred qu'en fait de Religion,  
 faut passer sur le ventre des Peres & des Meres. Il y  
 aut proceder nettement *μετὰ παρρησίας*, à mai-  
 ne leué (dit l'Apostre) sans se seruir en chose si sainte  
 aucun couteau de tripiere qui tranche des deux co-  
 z. Qu'on n'attende donc point de moy des panegiri-

ques, ny des apologie sen faueur des Protestans. Aussi ne suis-je pas marchand meslé, pour auoir de telle denrée en ma boutique. Non que pour cela ie sois homme de sang, ny qui corne la guerre. Au contraire ie souhaite la paix par tout, pourueu quelle soit à la gloire de Dieu, & m'assure que si les puissances Catholiques estoient vne fois re vnies, comme les gens de bien desireront, on la pourroit donner plus facilement à toute la Chrestienté, afin de tourner puis après toutes ces armes qui la deuorent contre le Turc, l'ennemy commun de nostre baptisme: Mais ie crains fort que l'Herésie qui a la concorde des Princes Catholiques suspecte, ne seme tousiours de la diuision entre eux, & ne les mette en ialousie, comme elle a accoustumé, par de vains & foibles respects. Courage donc (peuple Catholique) courage, Dieu vomit les tièdes, animez vous, eschauffez vous d'un saint zele à la defence de vostre foy sous les armes d'un Roy très-pieux, & le bras victorieux duquel a déjà triomphé de tant d'ennemis de l'Eglise. Ce ne sont pas des Titans ny des Sarcophages cõtre qui vous auez affaire. Ce ne sont que des Anglois qu'une simple Pucelle d'Orleans a autre fois chassé de ce Royaume. Ne doutez point qu'il ne s'en trouua encore quelqu'une dedans Paris aussi courageuse que celle là, pour faire ce mesme miracle, sous les heureux auspices d'un si grand Roy. Sathan est quelquefois reuestu en Ange de lumiere encore qu'il ne soit que Prince de tenebres: Aussi l'Anglois, tout Heretique qu'il est, se couure du specieux pretexte de Religion, pour venir tenter s'il pourra point reconquerir ce que les Peres ont perdu. Il se qualifie Roy de France, mais quel droit a-t-il à cette Couronne autre que celuy de ses predecesseurs, lesquels vsurperent ce tiltre? Il est vray, comme nous apprend nostre



histoire, qu'un Roy Edouard troisieme, fils d'une fille de France, fut le premier qui prist ceste qualite contre Philippe de Valois. Il est vray que Henry sixieme, gendre du Roy Charles le Simple, se seruit du mesme tiltre contre Charles septieme: Mais à ces deux querelles suffit pour deffence (dit le sieur du Tillet) des Rois tres Chrestiens la loy & la coustume de la maison de France, excluât de ladite Couronne les femmes & descendants d'elles. Et si autrefois l'Anglois a tenu dans ce Royaume quelques Prouinces en arrierefief, comme la Normandie, la Guienne, & autres, qui doute que le Souuerain ne les ait peu reünir à sa Couronne, quand il y a eu arrest de reuersion par la cour des Pairs, à cause de crime de leze Majesté, de rebellion, & d'autres malefices, comme remarque le mesme historien? Certes s'il falloit feuilleter de vieilles panchartes & s'en seruir, nous aurions bien plus de droit sur le Royaume d'Angleterre, que n'ont pas eux sur le nostre. Car leur histoire mesme leur apprend que sur la destitution d'un de leurs Rois, surnommé Jean sans terre, les Estats du pays, pour ses demerites, firent eslection solennelle du Roy Louys huitieme, auant son aduenement à la Couronne de France. Vous voyez (Chrestiens auditeurs) par ce discours comme ces gens là sont mal fondez en tout ce qu'ils scauroient pretendre sur nous. Qu'ils s'en retournent donc plus vite que le pas d'où ils sont venus. Nous n'auons que faire d'eux ny de leur reformation pretendue, laquelle n'engendre aussi que tout desordre. Car si ce Reformateur septentrional pensoit tout culbuter, & marier les Prestres & Religieux avec les Nonains comme faisoit le sacrilege Alberic, ie vous declare que pour moy ie renöce des à cet heure à cette crotesque reformation, qui me tueroit corps & ame, ne demadant pour toute femelle chez moy, que ma bonne femme de

mere, que Dieu me conferue pour la seruir en sa vieillesse, & quoy que l'ahane à viure tout mon traual ne butte qu'à m'acquitter de ce deuoir. Ne voyez vous pas (Mon sieur le Duc) par la queue du sermon de ce braue Athlete que ie vous viens de reciter, comme vous estes mal mené par les Catholiques? Pensez vous que nos Ministres vous espargnent non plus, & qu'ils ne vous mettent pas en beaux draps blâcs? Ie vous eusse voulu tenir Dimanche dernier à Charenton, à peine qu'au retour on vous eust donné à souper à la Bastille. Vous eussiez euy declamer à outrance l'eloquent Mestrezat, qui nous coniura tous au nom du Dieu viuant, de nous contenir en deuoir, & de viure & mourir sous l'obeyssance d'un si bon Roy, qui nous tient à couuert sous ses Edicts, comme la poule fait ses pousins sous l'ombre de ses aisles. Il prononça d'une voix tonnante, anatheme & malediction contre tous brouillôs & perturbateurs du repos public. Il nous proposa pour exemple la fidelité de nos Peres, & de toute la Noblesse de nostre Religion qui se ioignit avec feu l'Admiral de Chastillon pour chasser l'Anglois du Hure de grace, apres qu'on nous eut redonné la paix. Il nous mist encore deuant les yeux ces deux valeureux Marschaux de France bons parpaillots, & tant d'autres braues Gentilshommes qui ne branlent non plus que des rochers, & qui demeurent fermes au seruice de leur Prince, sans se maschurer d'aucune faction estrangere. Et pour le Roy vostre Maistre, il luy souhaita seulement un aussi bon conseil que celuy de feu son Pere, lequel fut si sage, qu'il ne se brouilla iamais avec ses voisins, & n'eut non plus cette demanaison de se mesler de leurs affaires. C'estoit aussi un Prince qui scauoit assez de quel bois nous nous chauffons, nous ayant appris en son present Royal qu'il n'aymoit pas d'une amour enragée les Pu-

titains ou Calvinistes, Ne pouuans (disoit-il) subsister avec  
 la paix d'un estat Monarchique, & desquels il auoit esté sou-  
 uent calomnié, non pour mal qu'ils trouuassent en luy, mais par-  
 ce qu'il estoit Roy, ce qu'ils luy imputoient à grand crime. Ca-  
 tholiques & Huguenots, vous galuaudans de la façon  
 que pouuez donc esperer en vn pays où toutes sortes de  
 vents vous soufflet au visage, & où vous n'estes recuei-  
 ly que par de certaines ceruelles volages, estourdies, &  
 qui à la premiere verue qui les prendra, seront les pre-  
 miers à vous planter là, & à vous laisser en bardouille.  
 Tendez donc vos voiles, resserrez ces tabours battans &  
 les enseignes desployees. Croyez qu'on ne vous promet  
 pas poires molles. L'armee du Roy sera toute regail-  
 lardie & animée de la presence de ce ieune Alcide, de ce  
 valeureux Gaston, frere vnique de sa Majesté, laquelle le  
 iura de pres la foudre à la main. Elle plaint seulement  
 comme faisoit Alexandre, qu'elle n'ait à combattre con-  
 tre des Roys & se colleter avec eux pour mieux faire pa-  
 roistre la grandeur de son courage. Le Guisart, le Neptu-  
 ne Gaulois est desia en mer, & semble que cette maison  
 prenne à tasche la ruine des pauures Huguenots, com-  
 me celle des Scipiôs la destruction de Carthage. Le vous  
 donne donc l'Abbaye de Vaten. Vous auez assez bien  
 operé à vostre voiage. Contentez vous d'auoir enter-  
 ré sept ou huit cens de vos bisognes au pied des vignes  
 de cette isle fatale. Vous auez assez immortalizé vostre  
 nom de les auoir engraisées de ce fumier, afin qu'aux sie-  
 les aduenir ceux qui mangeront de ces raisins y trou-  
 uent vn goust de Bouquin au lieu de muscadin. Toute  
 la grande Bretagne vous dresse des statues & des arcs  
 triomphaux en l'honneur de la conqueste d'une simple  
 motte de terre telle qu'est l'isle de Ré, au prix de ce grãd  
 royaume. Les Imprimeurs trauaillent fort & ferme à



l'impression de vostre histoire en beau papier blâc. Tant de pauures veufues vous apprestent des remerciemens de la mort de leurs maris, & tant de pauures orphelins de celle de leurs peres, lesquels vous auez sacrifiez comme autant de victimes abominables à la démolition du fort Louys, que vous leur auez fait voir de loing, comme vne seconde terre de Canaan, ou comme vostre pays, qu'on dit que Cesar môstra plustost à ses successeurs que non point qu'il l'eust conquis luy mesme. En fin toutes les Dames de la Cour vous attendent à Londres, pour vous couronner le chef de chapeaux d'orties & de fucilles de houx, au lieu des Palmes & des Lauriers qu'elles vous reseruent en vne meilleure fortune, & quâd le Dieu fin vous aura esté plus fauorable.

PSALVME 9.

*Croyez que tousiours les meschans  
S'en yront bas trebuchans,  
Et toutes ces gens insensées,  
Qui n'ont point Dieu en leur pensées.*

**FIN.**



